



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-1918/11
Sarajevo, 30.11.2011. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 01.12.2011			
Organizaciona jedinica	Klasifikaciona oznaka	Redni broj	Broj priloga
01-50-1-19-537/11			

Veza 01-50-1-15-10/11

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupničku inicijativu – dostavlja se

Vijeće ministara Bosne i Hercegovine, na 167. sjednici održanoj 23.11.2011. godine, utvrdilo je Odgovor na inicijativu koju je podnio Nermin Purić, zastupnik u Zastupničkom domu Parlamentarne skupštine Bosne i Hercegovine.

U privitku prosljeđujemo Odgovor radi njegovog dostavljanja zastupniku.

S poštovanjem,


GENERALNI TAJNIK
Zvonimir Kutleša

Bosna i Hercegovina
Ministarstvo sigurnosti



Босна и Херцеговина
Министарство безбједности

100-44-4

Radna grupa za monitoring provođenja Odluke o bezviznom režimu za građane BiH u EU

Broj: 05-14-1-385-14/11 SK
Sarajevo, 31.10.2011. godine

**GENERALNI SEKRETARIJAT
VIJEĆA MINISTARA BOSNE I HERCEGOVINE
n/r generalnog sekretara**

PREDMET: Poslanička inicijativa, informacija, dostavlja se – traži se;

Veza: vaš akt broj: 05/50-1-1918/11 od 03.10.2011.godine

U vezi vašeg akta, broj i datum veze, dostavljamo vam traženu informaciju na poslaničku inicijativu koju je uputio poslanik Nermin Purić na 10. sjednici Predstavničkog doma Parlamentarne skupštine Bosne i Hercegovine o stanju i problemima u implementaciji bezviznog režima za Bosnu i Hercegovinu.

S tim u vezi, dostavljamo vam sljedeće:

Na osnovu Zaključka Vijeća ministara sa 142. sjednice održane 25.01.2011. godine i 151. sjednice održane 25.05.2011. godine Ministarstvo sigurnosti Bosne i Hercegovine zaduženo da preuzme aktivnosti na monitoringu Odluke o bezviznom režimu za građane Bosne i Hercegovine u Evropsku uniju koji će provoditi Evropska komisija u saradnji sa zemljama članicama Evropske unije.

Ministar sigurnosti BiH, postupajući po navedenim zaključcima Vijeća ministara BiH, donio je Odluku o osnivanju Radne grupe za monitoring provođenja Odluke o bezviznom režimu za građane Bosne i Hercegovine u Evropsku uniju (broj: 03-14-1-385/11 od 28.01.2011. godine i broj: 03-14-385-65/11 od 22.06.2011. godine) čiji je zadatak da u saradnji sa Evropskom komisijom i drugim evropskim nadležnim institucijama i zemljama članicama, svim bosanskohercegovačkim nadležnim institucijama i agencijama, entitetskim ministarstvima unutrašnjih poslova i Policijom Brčko Distrikta, planira, koordinira i provodi sve potrebne aktivnosti na monitoringu Odluke o bezviznom režimu za građane Bosne i Hercegovine u Evropsku uniju, te sve izvještaje koje prosljeđuje Evropskoj komisiji prethodno dostaviti Vijeću ministara BiH radi upoznavanja.

Također, navedenom Odlukom sve unutrašnje organizacione jedinice i upravne organizacije u sastavu Ministarstva sigurnosti BiH dužne su dostavljati sve potrebne informacije Radnoj grupi.

Osnovni cilj djelovanja Radne grupe jeste praćenje implementacije obaveza/zahtjeva/mjerala napretka iz Mape puta za ukidanje viznog režima za građane BiH nosioce biometrijske putne isprave u EU / Šengen, a radi pripreme izvještaja Evropskoj komisiji na osnovu mjerila napretka iz dokumenta Mape puta za ukidanje viznog režima za građane BiH u Evropsku uniju / Šengen.

Oblast monitoringa obavlja se kroz mehanizam praćenja napretka u sljedećim oblastima:

- Upravljanje granicom;
- Sigurnost dokumenata,
- Borbu protiv organizovanog kriminala i korupcije,
- Efikasnu implementaciju Sporazuma o readmisiji i upravljanje migracijskim tokovima između EU i Bosne i Hercegovine.

Radna grupa monitoring procesa vizne liberalizacije provodi kroz proces:

- Redovnog održavanja sastanaka Radne grupe za monitoring;
- Sastanaka sa predstavnicima Delegacije Evropske komisije u BiH;
- Sastanaka sa predstavnicima Evropske komisije;
- Sastanaka sa predstavnicima zemalja članica Evropske unije;
- Sastanaka sa predstavnicima EU i drugih međunarodnih tijela/agencija;
- Izrade i dostavljanje periodičnih izvještaja Evropskoj komisiji;
- Izrade i dostavljanje statističkih izvještaja Evropskoj komisiji;
- Izrade i dostavljanje analitičkih pregleda Evropskoj komisiji;
- Izrade i dostavljanje „Ad hoc“ izvještaja Evropskoj komisiji;
- Pripreme i organizovanja posjeta i expertskih misija Evropske komisije u BiH; i
- i druge forme na zahtjev Evropske komisije i Delegacije evropske komisije u BiH.

S tim u vezi, Radna grupa za monitoring provođenja Odluke o bezviznom režimu za građane Bosne i Hercegovine u Evropsku uniju /Šengen u periodu od osnivanja do dostavljanja ove informacije održala je sedam redovnih sastanaka, kako slijedi:

- I. 07.02.2011. godine
- II. 22.02.2011. godine
- III. 21.03.2011. godine
- IV. 21.04.2011. godine
- V. 23.05.2011. godine
- VI. 21.09.2011. godine
- VII. 07.10.2011. godine

Odlukom o bezviznom režimu utvrđeni su dodatni mehanizmi za provođenje odluke o monitoringu, i to:

- Praćenje će biti sastavni dio godišnjih izvještaja Komisije o napretku reformi u ovim zemljama i o tome će se i sistemski diskutovati na odborima za Sporazum o stabilizaciji i pridruživanju.
- Utvrđivanjem specifičnih načina na koje će delegacije Evropske Unije, u saradnji sa vlastima BiH, informisati svoje građane kako bi spriječili rizike od zloupotrebe procedura azila.
- Uvođenje urgentnih konsultacija kako bi Evropska unija i njene zemlje članice, u saradnji s vlastima BiH mogle reagovati u najboljim mogućim uslovima na bilo koje poteškoće koje se mogu pojaviti kao posljedica migracije ljudi iz zemalja Zapadnog Balkana.
- Komisija će redovno izvještavati Vijeće i Evropski parlament, počevši nakon šest mjeseci od stupanja na snagu postojeće Regulative i iskoristiti rezultate rada eksperata iz Komisije i zemalja članica, delegacija Evropske unije kao i bilo kojih relevantnih informacija s kojima su upoznate zemlje članice.

Važno je istaći da u slučaju da se jedna ili više zemalja članica EU suoči sa urgentnom situacijom, koja se očituje iznenadnim prilivom državljana iz jedne ili više trećih zemalja, među kojima su i državljani zemalja Zapadnog Balkana, Komisija može predložiti da Vijeće usvoji privremene mjere u korist dotične/ih članice/a u skladu sa članom 78 Sporazuma (Treaty of Functioning of the European Union) te brzo ukidanje vizne liberalizacije. U urgentnoj situaciji koja je pomenuta u prethodnom paragrafu, Komisija će informisati Vijeće i Evropski parlament putem ad hoc izvještaja.

Dana 07.04.2011.godine Delegacija Evropske komisije u Bosni i Hercegovini prosljedila je pismo Generalnog Direktorata unutrašnjih poslova gosp. Stefana Manservisia u kojem se ministar sigurnosti Bosne i Hercegovine i članovi Radne grupe za monitoring provođenja Odluke o beviznom režimu za građane Bosne i Hercegovine u Evropsku uniju/Šengen pozivaju na sastanak u Brisel 11.05.2011. godine.

Također, u navedenom pismu gospodina Manservisia traženo je od Bosne i Hercegovine dostavljanje Prvog izvještaja o provođenju odluke o beviznom režimu za građane Bosne i Hercegovine, nosioce biometrijske putne isprave za putovanje u zemlje Evropske unije / Šengen. S tim u vezi, Radna grupa za monitoring provođenja Odluke o beviznom režimu za građane Bosne i Hercegovine u Evropsku uniju/Šengen izradila je i na 4. redovnoj sjednici usvojila Prvi izvještaj Radne grupe za monitoring provođenja Odluke o beviznom režimu za građane Bosne i Hercegovine u Evropsku uniju / Šengen - Pregled implementacije Mape puta o liberalizaciji viznog režima i Odluke o ukidanju viznog režima za građane Bosne i Hercegovine nosioce biometrijske putne isprave za period „post-viza liberalisation“. Navedeni izvještaj na engleskom jeziku dostavljen je dana 21.04.2011. godine, putem Delegacije Evropske komisije u Bosni i Hercegovini u Sarajevu, Evropskoj uniji/Evropskoj komisiju u Brisel na razmatranje.

S tim u vezi, dana 11.05.2011. godine u Briselu održan je Prvi sastanak predstavnika Evropske komisije i delegacije Bosne i Hercegovine u okviru mehanizma provođenja monitoringa Odluke o bezviznom režimu za građane Bosne i Hercegovine u Evropsku uniju.

Delegaciju Bosne i Hercegovine sačinjavali su: Sadik Ahmetović, ministar sigurnosti i šef delegacije, Osman Topčagić, Šef misije Bosne i Hercegovine pri Evropskoj uniji, Bakir Dautbašić, sekretar Ministarstva sigurnosti i predsjedavajući Radne grupe, Olivera Durić, sekretar Tužilaštva Bosne i Hercegovine i član Radne grupe, Ermin Pešto, pomoćnik ministra sigurnosti za graničnu i opću sigurnost, Samir Rizvo, pomoćnik ministra sigurnosti za međunarodnu saradnju i evropske integracije, Siniša Macan, direktor Agencije za identifikaciona dokumenta, evidencije i razmjenu podataka, Muaz Dedajić, savjetnik u Misiji Bosne i Hercegovine pri Evropskoj uniji, Irena Penc, stručni saradnik Ministarstva za ljudska prava i izbjeglice, Sanja Škuletić, stručni saradnik Službe za poslove sa strancima, i Almedina Milanović, prevodilac za engleski i francuski jezik.

Delegaciju Evropske komisije su sačinjavali: Luigi Soreca, šef odsjeka za vanjske odnose u Generalnom direktoratu za unutrašnje poslove, Paola Pampaloni, šef odsjeka za Bosnu i Hercegovinu pri Generalnom direktoratu za proširenje, Vera Alexandrova, ekspert u Generalnom direktoratu za unutrašnje poslove, i Giulio Veneri, ekspert u Generalnom direktoratu za proširenje.

Tokom navedenog sastanka u Birselu predstavljen je proces post-vizne liberalizacije, tj. ispunjavanje obaveza Bosne i Hercegovine iz Mape puta za liberalizaciju viznog režima u oblasti: upravljanja granicom i migracijama, sigurnosti dokumenata, borbe protiv organizovanog kriminala i korupcije, te efikasne implementacije Sporazuma o readmisiji i upravljanje migracijskim tokovima između EZ/EU i Bosne i Hercegovine. Poseban dio odnosio se na područje komunikacije i saradnje između agencija za provođenje zakona i ureda tužioca, sa glavnim osvrtom na uspostavljanje sistema razmjene podataka iz evidencija agencija i tužilaštava, potpunoj uspostavi Agencije za prevenciju korupcije i koordinaciju borbe protiv korupcije, uključujući hitno imenovanje direktora Agencije, te održivost i konzistentnost napora za borbu protiv organizovanog kriminala i korupcije, na svim nivoima.

Predstavnici Evropske komisije tokom navedenog sastanka u Briselu pohvalili su nadležne institucije i agencije u Bosni i Hercegovini na dosadašnjoj uspješnoj provedbi Odluke o bezviznom režimu za građane Bosne i Hercegovine u Evropsku uniju, pripremljenom i dostavljenom Izvještaju/Pregledu implementacije Mape puta o liberalizaciji viznog režima i Odluke o ukidanju viznog režima za građane Bosne i Hercegovine nosioce biometrijske putne isprave za period „post-viza liberalisation“ od 21.04.2011. godine, te provedbi neophodnih aktivnosti u vezi kontinuiranog napretka u implementaciji obaveza/mjerila iz Mape puta za liberalizaciju viznog režima za građane Bosne i Hercegovine u Evropsku uniju/Šengen. Također, predstavnici Evropske komisije tom prilikom istakli su da, obzirom da ne postoje problemi u implementaciji Odluke o bezviznom režimu za građane Bosne i Hercegovine u Evropsku uniju/Šengen, te da se građani Bosne i Hercegovine u dosadašnjem periodu bezviznog režima ponašaju u skladu sa evropskim standardima i mjerilima, odnosno očekivanjima, te da nema

zabrinjavajuće zloupotrebe bezviznog režima od strane građana Bosne i Hercegovine. Evropska komisija neće upućivati expertske misije u Bosnu i Hercegovinu radi provjere provođenja Odluke o bezviznom režimu, te da će se monitoring nastaviti kroz periodično dostavljanje pismenih izvještaja i statistika, te održavanje sastanaka. Na kraju sastanka delegacija Evropske komisije je saopštila da će se vrijeme održavanja drugog sastanka utvrditi u međusobnoj komunikaciji te da za sada ne postoji potreba za njegovim dogovaranjem.

Dana 06.07.2011. godine, a okviru post-viza mehanizma praćenja bezviznog režima, Evropska komisija uputila je zahtjev bosanskohercegovačkoj strani da zaključno sa 31.07.2011. godine dostavi odgovor na set pitanja o trenutnom stanju u implementaciji Odluke o bezviznom režimu za građane Bosne i Hercegovine u Evropsku uniju (tzv. *post-viza monitoring mehanizam*), odnosno precizirajući oblasti za koje je potrebno dostaviti navedeni odgovor. S tim u vezi, Bosna i Hercegovina je 29.07.2011. godine je Evropskoj komisiji u Briselu dostaviti odgovor na set pitanja, sa potrebnim informacijama o trenutnom stanju.

Kada je u pitanju povećanje broja tražitelja azila u zemljama Šengen/EU, Radna grupa posljednju zvaničnu informaciju o broju azilanata iz Bosne i Hercegovine primila je krajem maja 2011. godine kada je u svim zemljama EU ukupno bilo 180 državljana Bosne i Hercegovine sa lažnim zahtjevom za azil, što nije predstavljalo ozbiljniji problem, budući da se radi o izuzetno malom procentu u odnosu na druge države zapadnog Balkana i šire.

Po okončanju perioda godišnjih odmora, početkom septembra 2011., kada zvanično nije bilo zaprimljenih informacija o broju zahtjeva za azil državljana BiH, Radna grupa i Ministarstvo sigurnosti BiH počnu zaprimati određene neslužbene informacije o alarmirajuće povećanom broju azilanata u pojedinim državama članicama EU. U tom smislu kao prva zvanična informacija zaprimljena je zabilješka diplomatskog predstavnika BiH u Briselu Muaza Dedajića o diskusiji na redovnoj sjednici COREPER-a (tijelo EU koje sačinjavaju ambasadori zemalja članica u Briselu) na kojoj je pod tačkom razno raspravljano o ogromnom povećanju azilanata iz BiH u Italiji, 156 lica, a takođe se i referiše o navodnim pismima iz Mađarske i Austrije o povećanju broja azilanata iz BiH.

Radna grupa je bez odlaganja pristupila provjeri navedenih informacija, zbog nelogičnosti istih i analitički i faktično nemogućih, jer do septembra, u prvih 9 mjeseci bezviznog režima za BiH, u Italiji nismo imali niti jedan zahtjev za azil.

U periodu od 09. do 14. 09. izvršene su provjere vjerodostojnosti informacije prezentirane COREPER-u i utvrđeno je da u periodu maj-septembar 2011. godine u Italiji ima samo 1 zahtjev za azil, a zvanični predstavnici ambasada Mađarske i Austrije promptno su nas obavjestili da ne postoji nikakvo pismo njihovih zvaničnih organa prema Briselu o navodnom povećanju azilanata iz BiH.

Dana 19.09.2011. godine Radna grupa zaprima prvu neslužbenu informaciju iz ambasade u Briselu o povećanju broja azilanata u Belgiji i istu tretira na način sličan dotada zaprimljenim, jer sve dotadašnje informacije pokazale su se netačnim. Brzom reakcijom ambasadora BiH u Belgiji Branimira Jukića, a na zamolbu predsjedavajućeg Radne grupe, već 21.09.2011. godine utvrđeno je da u Belgiji zaista postoji osjetno povećanje zahtjeva za azil državljana BiH. Utvrđeno je da najveći broj ovih lica dolazi iz regiona sjevero-istočne Bosne sa područja općina Odžak, Odžak-Vukosavlje, Modriča, Gradačac i Brčko i da je ukupan broj azilanata u Belgiji oko 200.

Nakon potvrde tačnosti ovih informacija ambasador Jukić i predsjedavajući Radne grupe za monitoring provođenja Odluke o bezviznom režimu za građane Bosne i Hercegovine u Evropsku uniju Bakir Dautbašić su već 27.09.2011. godine posjetili belgijski imigracioni ured i sastali se sa generalnim direktorom istog Freddy-jem Roosemont-om.

Generalni direktor Roosemont je izrazio svoje veliko zadovoljstvo činjenicom da su BiH zvanične službe reagovala odmah na ovu pojavu, za razliku od drugih država regiona, i zahvalio se na ponudi za razmjenu svih relevantnih informacija koje mogu pomoći belgijskim vlastima, naročito onih vezanih za utvrđivanje identiteta državljana BiH, jer vrlo je česta pojava i trend da se državljani zemalja iz regiona predstavljaju kao državljani BiH kako bi imali duže procedure u odnosu na procedure prema državljanima Srbije ili Makedonije, te ponudi da se prva grupa državljana BiH kojima bude odbijen zahtjev za azil vrati o trošku Vijeća ministara u BiH avionom BH airlinesa što će svakako biti jasna poruka onim građanima koji planiraju odlučiti se za takav korak, da će ovu zloupotrebu prava na azil završiti na isti način.

Tog dana je i ministar sigurnosti BiH posjetio područja općina Odžak, Modriča i Gradačac gdje je sa načelnicima općina razgovarao o ovome problemu i zamolio da se građanima prenese jasna poruka da azil u bilo kojoj državi EU ne može dobiti niti jedan državljanin BiH i da su građani žrtve običnih špekulacija. Isto područje narednog dana posjetio je i generalni direktor belgijskog imigracijskog ureda Roosemont koji je predstavnicima općina i lokalnih zajednica prenio poruku da je u Belgiji nemoguće ostavriti pravo na zaštitu ili izbjeglički status, te da će svi zahtjevi za azil biti odbijeni u najkraćem mogućem roku.

Dana 28.09.2011. godine ambasador Osman Topčagić i predsjedavajući Radne grupe g. Dautbašić posjetili su zvaničnike Evropske komisije i razgovarali na temu povećanog broja azilanata u Belgiji, te reakcijama na istu pojavu. I na tom sastanku je naročito podvučeno zadovoljstvo zbog hitne i uspješne reakcije zvaničnih organa BiH na ovu pojavu, a što je Evropskoj komisiji dan prije službeno potvrđeno od belgijskih vlasti. Međutim, u drugom dijelu sastanka g. Dautbašić je pokušao dobiti zvaničnu informaciju kako je bilo moguće da jedno zvanično tijelo EU kao što je COREPER razgovara i donosi zaključke na osnovu potpuno netačne informacije o velikom broju azilanata iz BiH u Italiji. Nikakav odgovor nije ponuđen.

Dana 3. i 4. 10. 2011. godine održana je konferencija u organizaciji Evropske Unije sa zemljama zapadnog Balkana u Ohridu, na kojoj su prisustvovali ministri unutrašnjih poslova zemalja regije i evropska komesarka za unutrašnje poslove Cecilie Malmstrom. Na predmetnoj konferenciji ministar sigurnosti BiH prezentirao je Akcioni plan mjera koje će preduzeti bosanskohercegovačke institucije kako bi broj tražitelja azila značajno opao i bio sveden na minimalnu mjeru i isti je pozdravljen od svih predstavnika iz Evropske Unije.

Odmah nakon konferencije 5.10.2011. godine u Briselu je održan sastanak šefovima Radnih grupa za monitoring svih zemalja zapadnog Balkana sa predstavnicima Evropske komisije gdje su prezentirani akcioni planovi zemalja i gdje su se mogli čuti prijedlozi pojedinih predstavnika o modalitetima buduće saradnje. Predsjedavajući Radne grupe za monitoring provođenja Odluke o bezviznom režimu za građane Bosne i Hercegovine u Evropsku uniju g. Dautbašić je predložio bolji vid saradnje sa Evropskom komisijom u smislu razmjene podataka, jer tokom cijele godine niti jednom nisu dostavljene zvanične brojke o broju azilanata iz BiH, već je Radna grupa iste dobijala od zemalja članica na bilateralnoj osnovi što je svakako sporiji i teži način prikupljanja podataka. Na sastanku je predsjedavajući Radne grupe imao priliku izvršiti uvid u zvanični Bilten broj 9, kod jednog od učesnika sasatanka, izdatog od Frontexa, Agencije Evropske Unije koja priprema analize i procjene rizika nakon uvođenja bezviznog režima, i pročitati da se „povlače procjene date u prethodnim biltenima o povećanom broju azilanata u BiH u Italiji“ što je svakako dokaz o postojanju takve špekulacije o kojoj zvaničnici Evropske komisije nisu željeli razgovarati, a koja je pokrenula ogroman broj medijskih špekulacija u BiH.

U vezi sa navedenim Ministarstvo sigurnosti BiH predložilo je Vijeću ministara BiH donošenje sljedećih zaključaka:

- Nalaže se Ministarstvu sigurnosti BiH da kontinuirano nastavi sa pružanjem logističke podrške u provedbi monitoringa Odluke o ukidanju viznog režima za državljane BiH, Radnoj grupi za monitoring provođenja Odluke o bezviznom režimu za građane Bosne i Hercegovine u Evropsku uniju,
- Nalaže se Ministarstvu vanjskih poslova BiH da preko svoje DKP mreže, naročito u zemljama članicama EU, prati eventualne pojave informacija o povećanju broja zahtjeva za azil i o tome što hitnije obavjesti Radnu grupu za monitoring, kao i pruženje svakog vida podrške Radnoj grupi prilikom eventualnih posjeta,
- Nalaže se Ministarstvu komunikacija i prometa BiH da preduzme sve aktivnosti u saradnji sa agencijama za provedbu zakona u BiH o lociranju kompanija koje se mogu dovesti u sumnju da vrše organizovan prevoz lažnih azilanata u zemlje Evropske Unije,
- Nalaže se Ministarstvu za ljudska prava i izbjeglice da kontinuirano provede Strategije i Akcione planove vezane za integraciju Romske populacije u BiH, bez nepotrebnih kašnjenja i zastoja u provedbi istih,
- Nalaže se Ministarstvu sigurnosti BiH da iz budžetskih sredstava namjenjenih za ovu godinu osigura preraspodjelu sredstva za povratak prvog kontingenta lažnih azilanata iz Belgije, avionom BH airlines-a,
- Nalaže se Radnoj grupi za monitoring da bez odlaganja izvrši posjetu nadležnim organima bilo koje zemlje članice EU u slučaju pojave većeg broja azilanata iz BiH i pristupi hitnoj provedbi mjera ka sprječavanju ovih pojava ubuduće.

U periodu 10.-14.10.2011. godine expertska misija Evropske komisije boravila je u Bosni i Hercegovini, kada je u okviru prvog Post-viza liberalizacija monitoring procesa Odluke o bezviznom režimu za građane BiH u Evropsku uniju/Šengen posjetila nadležne institucije/agencije/organe (na različitim nivoima) s ciljem utvrđivanja dosadašnje implementacije preuzetih obaveza iz Mape puta za viznu liberalizaciju, odnosno implementacije bezviznog režima za građane Bosne i Hercegovine koji putuju u zemlje Šengena. Imajući u vidu naprijed navedeno, a na osnovu dostavljenih tema za razgovor (tzv. ToR - Terms of Reference) od strane Delegacije Evropske unije u BiH, nadležne institucije/agencije/organe (na različitim nivoima) preduzmele su sve neophodne mjere radi osiguranja kvalitetne pripreme i realizacije posjete expertske misije Evropske komisije u navedenom periodu.

Trenutno se očekuje dostavljanje mišljenja eksperata EK/EU o obavljenom monitoringu u navedenom periodu kada su obavili monitoring u sljedećim oblastima:

- Sigurnost dokumenata
- Azilantska politika i upravljanje migracijom
- Upravljanje granicom
- Borbu protiv organizovanog kriminala i korupcije
- Borba protiv pranja novca
- Efikasan rad agencija za provođenje zakona u Bosni i Hercegovini, uključujući tužilaštva
- Efikasnu implementaciju Sporazuma o readmisiji i upravljanje migracijskim tokovima između EU i Bosne i Hercegovine
- Oblast ljudskih prava

Na osnovu razgovora obavljenih na sastanku organizovanom u povodu završetka expertske misije EK/EU održanog u Delegacije Evropske unije u sarajevu dana 14.10.2011. godine, može se zaključiti da su experti EK/EU u većini oblasti zadovoljni dinamikom izvršenja obaveza iz Mape puta za liberalizaciju viznog režima za građane BiH u Evropsku uniju/Šengen.

S poštovanjem,

